

Un anochi di inspiracion cu Jermin Bell

ORANJESTAD - Riba dia-bierna anochi, 2 di augustus, e autor Arubiano Jermin Bell a lansa su prome buki titula "Nameless" na Biblioteca Nacional. E evento a inicia cu un introduccion cu a keda den man di e artista Rosabelle Illes. Den su discurso, Rosabelle a comparti algun anecdota di Jermin sigui pa detayenan biografico.



Despues di e introduccion, Jermin a recita algun di su scrituranan acompaña pa arte visual den forma di imagen, musica y baile. Su escritura "Sorry to the heart I never should have broken" a wordo transforma den un coreografia di baile crea pa Art Srisayam, un graduado di "De Theater school Amsterdamse Hogeschool voor de kunsten". Su escritura "Unlimited" a keda presenta conhuntamente cu un video y presentacion bibo crea pa artista visual y graduado di "Gerrit Rietveld



Academie", Robin de Vogel. Durante su presentacion, Jermin a splica e ideanan tras di e scrituranan y e mision di e buki "Nameless". Colectivamente, e buki tin como meta pa inspira cada ser humano pa conecta cu nan curason y biba un bida feliz. E temanan cu a wordo toca e anochi aki ta inclui entre otro, bida y morto, relacionnan romantico, e poder di e individuo y creencianan. Tambe Jermin a haci uzo di un 'inspirational vision board', caminda cu e publico por a tap na nan curason y produci metanan y inspiracionnan cu nan tin warda den nan curason. "Nameless" a wordo batisa dor di e autor su subrino Jayquon Bell di 2 aña. Jayquon a hinca e buki den un florero yena cu awa y petalanan di rosa cora. E forma di batisa e buki aki tawata uno simbolico, como cu Jermin su defunto mama tawata encanta rosanan cora y Jermin a dedi-

ca e buki na su defunto mama y su subrino Jayquon. Prome cu e parti oficial a ser clausura, e autor a entrega "Nameless" na directora di Biblioteca Sra. Astrid Britten y nos tata di cultura Sr. Padu Lampe. Na final di e anochi tur presente tawata tin e oportunidad di busca nan copia di "Nameless" y ricibi e firma di e autor. E produccion aki a keda realisa pa "Prins Bernhard Cultuurfonds Caribisch gebied". Actualmente, "Nameless" ta

obtenibel na tur librerianan local, ariba amazon.com of por yama 6614062 / 5930980 pa entrega. Despues di su bishita na Aruba, Jermin lo regresa Hulanda unda cu e ta finalizando su estudio den psicologia practico na Hogeschool van Amsterdam. Pa mas informacion tocante Nameless y Jermin Bell por tuma contacto cu e autor mes na 6614062, jerminbell@gmail.com, riba facebook, twitter y na Hulanda +31 611331283. □

